

方等部

金光明最勝王經疏

卷十九之
卷二十一

金光明最勝王經疏卷第十九

唐三藏法師義淨譯

唐白馬寺翻經沙門慧沼疏

無染著陀羅尼品第十三

無染著陀羅尼品三門分別。一來意二釋名三解難。言來意者。四天王觀察人天品下十六品初明學行流通有五初觀察品勸修行二四天王護國品下三品明守護三大辨才下五品明爲增引經行人福智四王法正論下三品明正持學五授記等四品成前勸修守護等意。就四王護國等三品

明守護中有三一令守護供養二令離染不退三
令離障如意上已明守護供養此明令離染不退
若有染著卽有退屈以執著故如無著菩薩般若
論解離不忍苦障中云不住一切法發阿耨菩提
等爲對治不忍流轉苦眾生相違苦匱乏受用苦
等今此亦爾故下文云若諸菩薩能安住者於無
上菩提不復退轉成就正願得無所依自性辨才
獲希有事安住聖道故說此呪護令離染不退修
行有此品生二釋名者梵云毗踰黎沙此云無染
著舊云銀主者非也所弘之法從最清淨法界平

等所流復由呪力能令離染無所住著故云無染
著陀羅尼者義如常辨三解難者問總持有四此
無染著何陀羅尼答是能令菩薩得無生忍陀羅
尼故。瑜伽四十五云云何菩薩能得菩薩忍陀羅
尼。謂諸菩薩成就自體堅固忍行具足妙智乃至
言不從他聞自正通達一切法義。謂於此義如是
通達一切言說所說諸法自性之義皆不成實唯
有諸法離言自性等。此經既云陀羅尼者非方處
乃至云無有法生亦無有法滅等。故知是也。或是
神呪總持。菩薩地云云何菩薩呪陀羅尼。謂諸菩

薩獲得如是等持自在。加被能除有情災患。諸呪章句。令彼章句悉皆神驗。能除非一種種災患。此經復云。身亦不被刀杖毒藥水火猛獸之所損害。故神呪攝。或可通二。文無簡故。問。準瑜伽說。四總持體非皆念慧神呪。總持卽說是定。得忍總持說是妙慧。云何爾耶。答。體性不同。有依因出體。卽說是定。有依能簡。擇出體。卽說是智。有依記憶出體。卽說是念。有依果出體。卽以所持之法。名爲總持。各據一義。皆悉不違。故智度論解總持云。以禪定得智慧火故。又云。智慧在菩薩心中。名般若小乘。

人之心。中名道品。不忘人心中名陀羅尼。故知瑜伽云。呪總持。說定得忍總持。云慧各隨義說。又呪持中云。得如是等持自在。故令神呪神驗等者。據因而說。非是剋體故。大莊嚴論云。得有三種。一報得。二習得。由現聞持力得。故三修得。由依定力得。故。由此故。知云。獲得如是等持自在。加被神呪。皆悉神驗者。由得定。故發勝念慧。能持諸呪。是約因出體。得忍總持者。忍是果。呪是忍因。由念慧力持。此得忍呪。故名能得菩薩無生忍陀羅尼。所持之呪。及能持體。俱以念慧爲體。或但能持以念慧爲

體所持呪非如以總持持於文義所持文義非念
慧故。或呪是因。由此呪力能得四種總持持彼四
法令不忘失。又瑜伽說得忍總持是妙慧者亦從
因說。云諸菩薩成就自體堅固忍行具足妙慧獨
處空閑寂無言說乃至云於佛所說得菩薩忍諸
呪章句能諦思惟如是句義不從他聞自在通達
了知如是諸呪章句都無有義等言成就堅固忍
行行者是因。因即妙慧得妙慧故獨處空閑寂無
言說等是修行處及修行儀於佛所說得菩薩忍
諸呪章句等是得忍因所學之法能思惟者是能

修行卽因也。故莊嚴論云。由現聞持力得故。故知
羅陀尼名非唯目於總持念慧。總持念慧因及所
持法皆亦名總持。故定及呪皆名總持。又所持法
義是總神呪與忍是別。以神呪及得忍呪亦俱有
法義故。問若云定慧是總持因。云何菩薩地云若
諸菩薩具四功德方獲總持。非隨闕一。答。因有遠
近。定慧近因。彼四因者。一於欲不貪。二他勝不妒。
三等施無悔。四於正法深生忻樂。此四遠因。問此
四總持於何位得。答。準瑜伽云。得此忍故。是諸菩
薩不久當得淨勝意樂地。菩薩法陀羅尼義陀羅

尼若過第一無數大劫已入淨勝意樂地所得決定已下雖得而不決定。如說法義。呪陀羅尼當知亦爾。準此卽是得忍總持在地前得餘入地得。據實而言。若約勝劣圓缺所得位不定爾。如解深密經等於第三地得聞持陀羅尼亦云於第九地得四陀羅尼。若約初證理得俱在初地約修習得俱通地前約任運得俱八地上。今瑜伽言忍地前得餘入地得互影彰爾。

爾時世尊告具壽舍利子。今有法門名無染著陀羅尼。是諸菩薩所修行法過去菩薩之所受持。是菩薩

母說是語已。

大文分六。一佛標名宗。二問答名體。三請佛陳說。四讚印爲宣。五顯勝勸修。六聞教喜學。此卽初也。有七。一明教主。二所逗機。三標呪名。四指應學。五舉曾勸。六明學意。以是菩薩母故。過去菩薩皆悉已學。故今菩薩所應修行。七結前標。文段可悉。具壽舍利子白。佛言。世尊。陀羅尼者。是何句義。世尊。陀羅尼者。非方處。非非方處。作是語已。

問答名體。初問後答。問中有二。一問名義。是何句義。是意云。何名無著等。復因何義句。是能詮之名。

非名句中名。已下問體。以諸法體卽是真如。非有非空等不可言說。如何可說。此陀羅尼。非方處者。離有非非方處者。離空。準下佛答有其七句。此略舉初句爲問。以影於餘。或舍利分悟世尊具悟故。說有多少。

佛告舍利子。善哉善哉。舍利子。汝於大乘已能發趣。信解大乘。尊重大乘。

下答有二。初讚後答。此讚也有二行。善哉者讚問。汝於大乘下讚德有三。初讚捨小已能發趣故。次讚悟大。信解大乘故。以信得解。非智證入故。法華

經云汝舍利弗。向於此經以信得入。況餘聲聞趣大以後。經二萬劫。始到十信初心。故涅槃經云。阿羅漢人二萬劫到。所言到者。到阿耨心。故未證悟。若約七地過種姓地。得在勝解行地。若約五位未住資糧位。但在善法欲。十信方得在資糧故。後讚堅固尊重大乘故。

如汝所言。陀羅尼者。非方處。非非法。非非法。非過去。非未來。非現在。非事。非非事。非緣。非非緣。非行。非非行。無有法生。亦無法滅。

下答有二。初答體。卽是諸佛下答名義。初中有二。

初述成後。然爲下答說。所以初述成也。非方處等。如前已解。第二非法等離詮。非法詮。非法非所詮。非法非。是不離其詮之法。是智證故。第三離三世。以常故。非三世。應有非非過去等。非離世法故。以影略故。第七句經亦同此解。第四事理對。是理非事。又云。非非事者。不離事法故。第五爲無爲對。非有爲緣生。非非有爲。了因顯故。或不離緣生法故。第六常無常對。行者遷流。眞如非行。非非行。同前釋。第七相非相對。以眞如理離生滅等十相故。諸法體生後無名滅。如既不生。故無法滅。舉此例餘。

第七離生滅相。此約三性中歸圓成實解。一切諸法所歸趣故。若約徧計及勝義勝義七句總遮。若約二諦相形總通遮表。如初非方處據勝義遮方處。表非方處。非非方處。約俗諦中以總持體所持之法。是依聲故。總持自性是念慧故。念慧非方。以依方處故。餘準可知。然據經意。約眞勝義心言路絕。總取遮表。不依依他及徧計。或通依三性俱得無失。

然爲利益諸菩薩故作如是說。於此陀羅尼功用正道理趣勢力安立。

答說所以然據勝義非方處非非方處等忘言絕相然今爲利益諸菩薩故於方便道理依俗諦中作如是說。依何說法耶。謂於此陀羅尼卽指所說法體依四種義安立施設名之爲說。下言安立者施設別名。依此四義而安立故。言四種義者。一功用。卽依總持有能得果之功用說。二正道。卽此功用體離二邊證正理故名爲正道。卽念慧等。三理趣。則是眞如及所持法義等是念智等境總名理趣。四勢力。由此法義能念慧等滅惡生善證理得果故名勢力。卽法威力。欲明能詮契順諸法故。或

卽總持念慧法二有能攝持生善滅惡之勢力也。卽是諸佛功德諸佛禁戒諸佛所學諸佛祕意諸佛生處故名無染著陀羅尼最妙法門。作是語已。

答問句義。初答義故名無染著下答句。句卽名也。前功用等四義在佛卽俱名功德等。或能爲因依。此能得佛不共法等名功德。能令離過名禁戒。爲佛師故名所學。法身妙理深難測故名祕意。成報化佛故名生處。由能詮教詮此義故名無染著法門等。或卽念慧名爲法門。與所持法爲門。卽法之門。或依此總持能出生功德等妙法卽妙法之門。

或此妙法通能所出。卽通依主持業兩釋。

舍利子白佛言。世尊。唯願善逝爲我說此陀羅尼法。若諸菩薩能安住者。於無上菩提不復退轉。成就正願。得無所依。自性辨才。獲希有事。安住聖道。皆由得此陀羅尼故。

第三請佛陳說有二。初請說若諸菩薩下第二請意。請意有二。初能學人。二能安住者。下明修教得利益有六。一得不退。隨信住等四種不退。二得正願。謂十大願。發菩提心論云。一者願我先世及以今身所種善根。施與一切悉共迴向無上菩提。令